

Segns da speranza per en bung futur

Uniun da mastirants e commers

DA GION NUTEGN STGIER / ANR

■ Er igl davos onn è l'uniun danovamaintg stada politic activa. La «Famiglia Savognin» vign integrada ainten la nova societad turistica. Las persungas tgi appartignan alla suprastanza èn neidas confirmadas per en onn an lour uffezi. Cun ena participaziun da 30 delts è la radunanza generala dall'Uniun da mastirants e commers stada bagn frequentada. En fatg plaschevel è sto da vaseir quant giovens mastirants tgi eran dalla parteida, chegl tgi conferma tgi vagn er an Surses ena pi ferma economia tgi chegl tgi blers creian. Daple gleisch aint igl horizont vei er Conrad Plaz, igl president dall'uniun. An vista a l'egn u l'oter project tgi duess neir realiso ins dastga er vurdar pi positiv aint igl avigneir turistic an Surses. Schinavant tgi igls dus hotels vignan realisos a Savognin fess chegl en grond zap anavant, è punctuo Plaz. El vegia er l'impressiun tgi l'atmosfera tar mastirants e patrungs e tar tots igls purtaders turistics seia per en po miglra tgi anc avant en onn.

Avert er per oters projects

El sez, pero er blers commembers dall'uniun, vegian adegna puspe drizzo critica anvers igl cumegn Surses ed igl turissem, tgi ainten la Val seia ple u manc stagnaziun, è detg Plaz. Da metter las dus organizaziuns turisticas (Savognin Turissem/consorzi turistic digls cumegns) sot en tetg cun fundar la societad acziunara, la Turissem Savognin Beiva Alvra SA tgi l'Uniun da mastirants e commers Surses seia er participada cun 10 000 francs, seia en cler segn an vista ad en futur turistic

pi fritgevel. La nova gondla da Savognin a Tigignas vigna realisada e sen la glista ins vegia anc oters projects. Chegl seian igl parc da bike tranter Somtgant e Tigignas, la colliaziun d'anviern a Radons, igl kiosk agl lai Barnagn, la halla da glatsch a La Nars ed igl center da passlung a Rona.

Per bunas cundiziuns da basa

Ena fegnameira dall'Uniun da mastirants e commers Surses seia anc adegna da vurdar tgi igl cumegn Surses s'angascha daple per bunas cundiziuns da basa, è accentuo igl agent d'immobiglias. Ensatge pi pacas ordinaziuns e regulaziuns fasschessan pero er bagn all'economia. Gist chegl tgi pertotga leschas e taxas seia da gronda impurtanza tgi igl cumegn Surses riguarda l'economia ed igl turissem. An spezial tar las taxas d'ava e da rusment ins vess da neir ancunter ad affars, hotels e restorants.

Oz anc 219 commembers

Cugl project «Savognin 2020» è l'Uniun da commers e mastirants Surses neida igl 2015 pi activa sen camp politic e turistic. A madem mument cugl project «Savognin 2020» è er neida lantscheda l'acziun «Famiglia Savognin», ena uniun per giasts ed indigens tgi paian 300 francs ad onn per sa participar a dus occurrenzas pi grondas durant igl onn. Chellas duessan dar daple veta alla regiun e cunzont er promover igl contact tranter indigens e giasts. Curt siva la fundaziun veva la «Famiglia Savognin» prest 300 commembers ed oz en chegl anc 219. Alla testa da chella uniun stat Vendelin Coray e sies angaschamaint per l'organizaziun è exem-



Gratulaziun digl president e da dus commembers digl cader dalla Uffer SA pigl nov commember d'onour dall'uniun: Patric Vincenz, Conrad Plaz, Enrico Uffer e Sascha Pittet (da san.).

FOTO G. N. STGIER

plaric. Sen la fegn da chest onn duess l'uniun neir integrada ainten la Turissem Savognin Beiva Alvra SA (partiziun tgira digls giasts).

Ansolver cugl nov president cantonal

Cun esser varsaquants projects sen buna veia e cun integrar la «Famiglia Savognin» direct aint igl turissem è previa da redutgier igl domber dallas persungas tgi

fon part alla suprastanza dall'Uniun da mastirants e commers Surses. Chegl è sto igl muteiv tg'ins è eligia la suprastanza angal per en onn. A chella fon part Conrad Plaz, president, Vendelin Coray, Giancarlo Cavegn, Roberto Guetg, Karin Hersche e Giani Spinatsch. La commembranza d'onour dall'uniun è retschet Enrico Uffer, el tgi è sto varsaquants onns president e magna oz cun success la Uf-

fer SA a Savognin. Gratulo è Plaz agls quatter affars tgi on retschet igls davos onns en premi naziunal ed internaziunal per lour buna lavour. Segl program stat er chest onn igl ansolver da mastirants digls 06-06 allas 06.00 e chegl a Tigia. Dalla parteida vignan er ad esser Herbert Stieger, igl nov president cantonal digls mastirants e patrungs ed igl directour Jürg Michel.

Daple forza ed angaschamaint per igl svilup

Turissem Savognin Beiva Alvra: Linda Netzer aint igl cader

■ (pb) La Turissem Savognin Beiva Alvra SA è siva digl 1. matg 2018 an acziun. Ossa ègl do ena amplificaziun persunala tar la direzziun. Dasperas Daniel Fischer scu president dalla societad acziunara e Tanja Amacher scu directoura turistica vign da nov Linda Netzer a far part alla direzziun an en pladimaint da 70%. Ella vign ad esser responsabla per igl svilup dalla destinaziun. Linda Netzer (41) abitescha a Savognin cun la sia famiglia ed è gio experientscha turistica sur blers onns. Anfignen avant en onn è ella stada suppleanta da direzziun da Lai Pencilularas e responsabla per l'administraziun.

Igl sies nov post tar Turissem Savognin Beiva Alvra SA è ella gio antschet igls 16 da matg. Ella cumplettescha igl team da direzziun cun Daniel Fischer e Tanja Amacher. Chel team è diversas incumbensas strategicas ed operativas. Ins vot fixar tge veias tgi ins vot eir per contanscher las fegnameiras turisticas ed economicas per la regiun scu er anfermeir igl spazi per veiver e luvrar ainten la regiun. Chegl duess neir fixo anfignen la fegn 2018.

Svilup dalla destinaziun

«Ja ma saint a cò da tgesa ed ia sung persvadeida tgi chella regiun è igl mument ena atmosfera da partenza. Per me ègl en grond cletg tgi chegl capeta ossa quasi davanti la mia porta. Ia sung fitg mutivada e less contributeir la mia part per en avigneir positiv», dei Netzer. «Ia sung persvadeida tgi cun igl dialog ed igl barat dad ideias ins saptga contanscher bler communablamaintg. Uschia vei ia er la mia rolla ainten chesta nova funcziun.»

Tge vot deir svilup dalla destinaziun? Impurtant è tenor igl team da direzziun tgi detta ena clera strategia, en maletg di-

rectiv communabel per l'antiera regiun. Gl'è gio do diversas discussiuns, otras niron a suandar per lascher davantar igls singuls pass pi clers e pi concret. I dat er diversas instituziuns, gremis e gruppas da lavour tgi èn gio activas ainten chella direzziun. «Egna dallas mias incumbensas las pi impurtantas vei ia da cumpiglier e priorisar tot las ideias ed igls projects an barat cun igls divers partenaris. Ed a madem taimp dad iniziier e sviluppar novs projects per la destinaziun.»

Siva digl 1. favrer lavoura Daniel Kunfermann scu nov sviluppader regional. È betg cò igl prievl da tschertas sperditas

dallas forzas? Netzer è persvadeida gist digl cuntrari. Cun chel post duessigl dar ena concentraziun dallas forzas. I duess an mintga cass esser la clera fegnameira tgi ins focussescha las activitads e colloborescha ferm sen tot igls camps. Pi blers tgi s'angaschan per en svilup e pi grondas èn las schanzas tgi ins reussescha.

Las premissas èn preschaintas

Linda Netzer: «Ia sung incantada dalla diversitad – turistica, culturala, dalla cuntrada e dalla nateira ed ansomma dallas activitads schi diversas – ed igl grond

potenzial vei ia cun colliier e da stimar vicedevlamaintg igls sforzs.»

Ella vei chegl er scu schanza da lascher d'en mang igl pansar pitschen e davantar consciaint da chel bier bung tgi vagn e tgi savagn biagier sen chegl. E tgi savagn sviluppar cun bunga conscienzta ena sanga confidanza an sazez ed esser loschs giudlonder. E chegl collectiv.

En exaimpel concret èn igls products agricols: Nous vagn blers pours ainten la regiun. Igl animals vignan savens vandias e la tger, la langa ed igl latg von davent. I fiss pi prudent da dar daple valeta agls products, colliier las offertas ed in-

scenar las activitads – far ena visita agls animals cugls giasts sen l'alp, offerir tragtas cun tgerm locala ainten ustareias, vender igls products tar las buteias agl stradung ed online, far events scu la Tundeida. I exista gio bier digl bung – igl Parc Ela, igl Festival Cultural Origen, ena infrastruttura ed offertas turisticas variontas, la cultura tradiziunala ed impresas cugl bung senn pigl avigneir: Schi ans reussescha da colliier e collaborar pi intensiv per la madema fegnameira – en avigneir positiv – ins gudogna ena forza cumbattiva enorma. Ena sfida per igl avigneir vign er ad esser tgi antras la digitalisaziun vign la nossa moda e maniera tgi luvragh ed abitagn a sa midar considerablamaintg. «Ia crei tgi vegian tot las premissas per dominar chellas midadas. Schinavant tgi ischans pronts dad acceptar chegl scu schanza.»

È la rolla dopla problematica?

Avant en taimp è nascheida l'iniziativa dad Anim tgi s'occupa er cun igl svilup digl avigneir e dalla quala Netzer è la fundatoura ansem cun Niki Wiese e Flo Wieser. Sa mordan betg chels dus posts ainten la madema persungas?

«Na, ansomma betg», manegia ella. «I dat clers cunfegns. La mia incumbensa tar Turissem Savognin Beiva Alvra è defineida cleramaintg scu fegnameira economica. Anim dantant è en luvratori dad ideias noua tgi vo per creativitat, transfer da cunaschientschas e divers impuls per saveir dominar las sfidas digl avigneir.» E cò dettign en grond potenzial da sinergieas. Antras la sia rolla tar tottas dus organizaziuns ins vo da chegl anor tgi chellas dus rollas sa completechan da maniera optimala e rinforzan l'egna l'otra.



Linda Netzer duess an sies nov post da 70% tar Turissem Savognin Beiva Alvra dar sustign aint igl svilup dalla destinaziun.

PDS